

MONASTERIENSIS EPISCOPATUS.

peregrinis Anabaptistis, oppidani, quippe in re lauta erant, subdixerunt sese ei, quam praevident, tempestati. Hæc facta sub initium anni MDXXXIV. Debilitatis autem alterius partis viribus, deligunt Anabaptistæ Senatum suæ factionis: creant Consules, & in his Knipperdolingum: templum suburbanum Mauritiî incendunt: urbem spoliant: eos, qui suæ sectæ non erant, expellunt, bonaque ipsorum occupant. Quum autem Episcopus jam urbem cœpisset obsidione cingere, evenit multis qui urbem deserebant, ut ab Episcopi copiis cæderentur. Ita coacti etiam sunt in urbe quidam furoribus Anabaptisticis applaudere. Quæ in urbe à fanaticis tempore obsidionis gesta sunt, longum esset narrare, estque res in omnium ore atque oculis. Nihil fuit indignius, quam quod sceleribus flagitiisque suis profani homines divinum quoque nomen & religionem obtenderent. Semel meliorem partem cœpit impetus vindicandi sui, & furiosum bacchantium gregem opprimendi, sed captis quinquaginta, & post multa tormenta occisis, desperatum est postea. Hoc tempore adsumpsit sibi Ioannes Leidenensis titulum Regis, & se pro

Rege, ut potuit, gessit, uxore etiam primaria (nam plures habebat) Regina nomine habituque ornata, quam tamen postea, quod minus probasse ipsius actiones visa esset, ipse obruncavit. Tandem post multas calamitates atque infanias anno MDXXXV, die 27 Iunii, noctu sub horam undecimam copiæ Episcopi, cui se junxerant Colonienfis Præsul Hermannus, & Dux Clivenfis, cum Lantgravio Hassiæ, silentio ad urbem accedunt, & ducente quodam perfuga per fossam ad vallum enituntur. Inde patefactis portis admissoque exercitu capiunt urbem. Rex vinctus cum sociis ad vicinos Principes circumducitur, ac tandem anno MDXXXVI candentibus forcipibus discerpitur. Hic exitus fuit factionis Monasteriensis.

Anno MDCXII, 11 Aprilis, publico omnium bonorum gaudio, solennibus & consuetis ceremoniis huc introductus est Ferdinandus, Dux utriusque Bavariæ, Archiepiscopus & Elector Colonienfis, Episcopus Leodiensis, Coadjutor Paderbornensis, Administrator Hildesheimensis.

